



幸福 仰脣想仰脣講

「咿~~，咿~~，炎炎咿~~」一聲一聲清亮个蟬噉聲，對樹頂高傳落來，提醒當在樹下行路、運動个人：熱天到咧。係啊，熱天到咧！往年這時節，係萬物盡壯旺个季節，春日嬌尸个青轉做硬程个綠，花大紅、草根旺，樹頂高闊、樹下、草埔乜共樣恁闊。遠遠近近个禾田，係青色个波浪，在南風个一推一搥之下，帶緊打胎禾串正有个清香連到山腳下去，這係往時第一聲蟬噉時節个光景，係分人感受生命跳動个季節。毋過，今年嘎無已相同咧，春天有秋天个黃葉，熱天正到，斯鼻著該屬於寒天个恬，仰會恁泥呢？

天穿日寮過，慢冬禾割撇了後正種个馬鈴薯，也陸陸續續收成撇咧，照理講禾田項這下該當愛起勢無閒正著，毋過，一日、兩日……燥渴个地土，等毋來禾秧田項倒影个日出月落，白鶴無眼睇腳下个這埕地土，直接飛過燥絲絲个田坵，在少水个圳溝肚絡食。溝壠个光景也無已好，石牯比水多，耐命个吳郭魚在水竇貶肚貶肚，啟氣个鰓鰓一開一合，分人聯想著該加護病房肚个病人，無已清淨个汶水，慢趁慢趁流過河壩底，少撇往日盤過石面个傲氣、陣打陣个風神，但無聲無說恬恬流往下！

春天過撇咧，等毋著該落个雨，水庫斯無水好人，民生、工業又下下愛用水，缺水、少水係大問題，食糧還罇个條件之下，休耕係無法度个決定。無水灌溉，怪得田坵燥渴，連耐命个野草乜渴去頭犁犁、無氣無脈，步道兩片个大樹下，一地泥像秋風掃過个落葉樣，蟲聲、鳥聲奄奄，也少撇日頭下對生命个亮度，這現象，做普通人个，無解！顛倒係臨暗个日頭柔柔吊在天邊，佢用溫柔、有燒度个光，安慰 這兜、還過分佢苦毒歸日个地土。一波官煞一齣又續核上棚，水个问题官解決，新冠病毒又過來報到咧，正經係無米又兼閏月哦！今年个變種病毒比舊年个病毒又還較得人畏，還个強勢、闊度有加無減，這病毒一變再變，滅去全球各國都唉唉唧唧、無結無煞，各層面个影響，應該毋係「食力」斯帶得過个，看 臺灣日日遭著病毒个人數還係恁多，實在驚人！

擘開目，迎來个係日頭刺目个光，好天該當愛有好心情，毋過，想著必痕个田坵、無歌聲个圳溝，心情愛好怕斯已難。好久無過家寮、邊街路咧，期待落雨、萬望疫情遽過，該食，食！該寮，寮！係幸福。

作者：劉玉蕉

☆詞彙學習☆

【嬌尸】giau+ shi+：柔弱而惹人疼。

【打胎】da^ toi+：稻子結穗。

【無眼睇】mo^ ngien^ tai^：看不上；看不起。

【貶肚】bien^ du^：翻白肚。

【鰓鰓】hoi^ soi+：魚的呼吸器、鰓。

【傲氣】ngau^ ki^：盛氣凌人。

【無聲無說】mo^ shang+ mo^ shod^：無聲無息。

【奄奄】ngiem^ ngiem^：沒精神、無精打采狀。

【無米又兼閏月】mo^ mi^ rhiu^ giam+ rhun^

ngied^：諺語，如華語的屋漏偏逢連夜雨。

【刺目】ciug^ mug^：刺眼。

【必痕】bid^ fin^：龜裂的痕跡。